

## Abstracts

### Andu S. Olsen

Inuusuttut inissinneqarsimasut inersimasunngornermut ikaarsaarnerat qitiutillugu suliniuteqareermermi malinnaanissaq pillugu isumasioqatigiinneq ulluni 23. – 24. november 2010 Ilulissani ingerlanneqartussa q Isumaginninnermut Naalakkersuisoqarfimmit aqqissuunneqarpoq.

Suliniuteqareermermi malinnaasarneq qitiutinneqarpoq inuusuttut ilaqutariinni paarsisartuni imaluunniit ulloq unnuarlu paaqqinniffinni alliaartorsimasut inersimasunngulerneranni nammineertussanngornerannilu inuunermik ajunngitsumik ingerlatsinissaat qularnaarniarlugu. Misilittakkat takutippaat inuusuttorpasuit inissinneqarsimasut atuarnerminnut, ilinniagaqarnerminnut, suliffimmik misiliinerminnut suliffeqarnermullu tapersorneqarnissaminnik pisariaqartitsisartut, aamma inuusuttoq ilaqutariinnit paarsisartunit imaluunniit ulloq unnuarlu paaqqinniffimmiit nooreersimagaluarpat. Tamatuma saniatigut inuttut inooqatigiinnikkullu attavissaqalernissamut tapersorneqarnissamut ilaatigullu aningaasaqarneq il.il. pillugit siunnersorneqarnissamut inuusuttut pisariaqartitsisinnaasarput.

Isumasioqatigiinnerup siunertaraa suliniuteqareermermi ajunngitsumik malinnaanissaq pillugu ilisimasaniq paarlaasseqatigiinnissaq. Inuusuttut inissinneqarsimasut inersimasunngornerat qularnaarniarlugu periarfissanik nutaanik nassaarniarnissamut suliatigut ilinniarsimasut isumassarsinissaannut isumasioqatigiinnermi periarfissinniarnearput.

Meeqqanik inuusuttunillu ulluinnarni suliaqarlutik ingerlataqartut arlalissuit isumasioqatigiinnermi peqataassapput. Saqqummiussisoqassaaq nunatsinni ulloq unnuarlu meeqqanut inuusuttunullu paaqqinniffimmiit ataaseq, Piareersarfimmiit aamma inuusuttoq siusinnerusukkut inissinneqarsimasooq, suliniuteqareermermi malinnaanermi nammineq misilittakkani eqqartussavai. Taakku saniatigut Norgemi Danmarkimilu misilittakkat pillugit saqqummiussisoqassaaq.

### Ann Andreassen

”Suliniuteqareermermi malinnaaneq... annassutaasinnaavoq”

Kalaallit Nunaanni inatsisiliorneq meeqqat ulloq unnuarlu paaqqinniffinnut ilaqutariinnullu paarsisartunut inissinneqarsimasut suliniuteqareermermi malinnaaffigineqarnissaannut periarfissiivoq.

Suliniuteqareermermi malinnaaneq piareersarluarsimasooq, inuusuttup pisariaqartitaanut nukissaanullu tulluarsagaq, inuusuttut inuunermi ingerlaqqinnissaannut aalajangiisuulluinnarpoq.

Suliniuteqareermermi malinnaaneq pitsaasuussappat, tamanna ilinniarsimasunik sulisoqarnermik suliassaqrifiillu akimorlugit suleqatigiinnermik piumasqaateqarpoq. Suliassaq inuusuttunik suleqatiginnikkut paaseqatiginnikkullu naammassineqassaaq. Inuusuttut aalajangiinernut peqataatinnissaat, nammineq akisussaaffimmik tigusinissaat ineriartornermullu peqataanissaat pingaaruteqarput.

Inuusuttut assigiinngiaartunik pisariaqartitsisarput. Inuusuttut ilaat ukiuni arlalinni ulluinnarni annertuumik ikorfartorneqarlutillu ikiorneqarnissaminnik pisariaqartitsisarput, allalli

pisariaqartitsinertik naapertorlugu tusarnaarneqarnissartik siunnersorneqarnissartillu pisariaqartillugu ornitassaminnik pisariaqartitsisarput.

Inuusuttut ukiorpassuarni ulloq unnuarlu paaqqinniffimmi ilaqutariinniluunniit paarsisartuni najugaqarnikut attaveqaatitik pisariaqartinnerpaasatik tassani attavigisarpaat. Taamaasillutik inuusuttut inissinneqarsimaffiginikuusaminnut atassuteqarnerat angajoqqaaminnut atassuteqarnerannit pitsaanerusarpoq. Taamaattumik killiliussat taakku iluini suliniuteqareermermi malinnaasarnissaq pingaaruteqarpoq.

Suliniuteqareermermi malinnaasarnermi pingaarutilik alla tassaavoq, ulloq unnuarlu paaqqinniffiup ilaqutariilluunniit paarsisartut avataatigut attaveqaateqalernissaq, taamaasillutik inuusuttut suliniuteqareermermi malinnaaffigineqarneq taamaatippat allanik attaveqarlarsimaniassammata. Pingaarutilik alla tassaavoq, inuusuttut suliffeqalernissaminnut piareersarneqarnissaat, ilinniarnikkut imaluunniit suliffimmi sungiusarnikkut.

Suliniuteqareermermi malinnaasarneq annassutaasinnaavoq - inuusuttut piuneranik ilisimannippata, tassunga tatiginnippata atuinissaminnullu akuersippata atorneqarsinnaasoq.

### **Hege Sundt**

Norgemi suliniuteqareermermi malinnaasarneq – meeqqanik inuusuttunillu 18-init aamma 23-t akornanni ukiulinnut suliniuteqarneq

Norgemi meeqqanik inuusuttunillu suliaqarneq meeqqanik inuusuttunillu sullissineq pillugu inatsimik aaqqinneqartarpoq, aamma suliniuteqareermermi malinnaasarneq. Inuusuttut 18-inik ukioqalernissartik sioqqullugu meeqqanik inuusuttunillu sullissisunit ikiorserneqarsimasut tamanna 23-nik ukioqalernissartik tikillugu ingerlatiinnarsinnaavaat.

Inuusuttoq ikiorneqarnerup ingerlaannarnissaa pillugu kommunimi meeqqanik inuusuttunillu sullissisunit qinnuteqassaaq, aamma 18-inik ukioqalernerup kingorna ikiorneqarnissamut akuersissuteqarluni. Meeqqanik inuusuttunillu sullissisut qinnuteqaammut itigartitsissagunik pisussaaffeqarput inuusuttoq ilisimatissallugu, tamanna Amtmandimut naammagittaalliuutigisinnaagaa.

Inuusuttoq ikiorneqarnissamik suliniuteqarnissamut naaggaartoq meeqqanut inuusuttunullu inatsisit malillugit peqqissimissuteqarnissaminut periarfissaqarpoq. 23-nik ukioqalernissartik sioqqullugu qaqugukkulluunniit saaffiginnissinnaapput taavalu suliniuteqareermermi malinnaasarnernerup suliniutigineqarnissaa pillugu qinnuteqarlutik. Inatsisip kingullermik allannguuteqarnerata kingorna, inuusuttut meeqqanik inuusuttunillu sullissisuniit ikiorneqarnerup ingerlaannarnissaanut naaggaarsimasut 19-inik ukioqalerpata, meeqqanik inuusuttunillu sullissisut taakkununga attaveqartussaati-taapput, paasiniarlugu suliniuteqareermermi malinnaaffigineqarnissartik kissaatigilersimaneraat.

Meeqqanut inuusuttunullu inatsimmi aalajangersagaqareerpoq inuusuttut isumassuinerup ataani sullinneqarsimasut suliniuteqareermermi malinnaaffigineqarnissaat piareersarneqassasoq. Inuusuttup 18-inik ukioqalernissaa sioqqullugu piffissaagallartillugu inuusuttoq attavigissavaat eqqartuiffigalugulu inissisimanera atuutiinnarneqassanersoq, imaluunniit inuusuttoq ikiorsiinermik allamik tunineqassa-nersoq. Inuusuttoq akuersaarpat inersimasutut inuulernissaminut aqutissaa pilersaarusiorneqassaaq aamma ikiorsiinerit suut meeqqanik inuusuttunillu sullissisunit imaluunniit ikiuisartunit allanit tunniunneqassanersut. Pilersaarusiaq allanngorneqarsinnaavoq. Pingaartillugu isiginiarneqassaaq inuusuttoq suleqatigalugu pilersaarusiaq suliarineqartariaqarmat.

Aningaasatigut ikiorsiineq, angajoqqaarsiaqarneq, inigisamut aamma tapersersortimik ikiorsiineq Norgemi suliniuteqareermermi malinnaasarnermik suliniuteqarnermi atorpeqarnerpaajupput. Inersimasutut inuulernissamut ikaarsaariarnermi inersimasumik aalajaatsumik avatangiiseqarneq pingaaruteqarluinnartoq paasineqarsimavoq.

Norgemi suliniuteqareermermi malinnaasarneq pillugu ilisimatusartoqarsimavoq, sulilu annertuumik ilisimatusartoqarluni, aamma tamarmiullutik naliliipput suliniuteqareermermi malinnaasarneq inuusuttup inersimasutut inuunermini nammineersinnaanissaanut annertuumik pingaaruteqartorujussuusoq.

### **Ida Hammen**

Suliniuteqareermermi malinnaanissaq pillugu isumasioqatigiinneq: Ilulissani ullut 23. – 24. November

Turf Böcker Jakobsenimit, Ida Hammenimit aamma Lena Steenimit nalunaarusiaq tunngavigalugu, SFI – Det Nationale Forskningscenter for Velfærd-imi antropolog aamma ilisimatusarnermut assistentimit Ida Hammenimit eqikkaaneq.

*Suliniuteqareermermi malinnaaneq – inuusuttut angerlarsimaffiup avataanut inissinneqarsimasut inersimasunngoriartorneranni tapersersuineq*

'Assigiimmik Periarfissaqarnissaq' pillugu danskit iliuusissatut pilersaarutaasa iluani misiliutaasumik suliniuteqareermermi malinnaanerup qiteqqunnerani naliliineq.

Suliniuteqareermermi malinnaasarnermut soqutiginninneq Danmarkimi annertusiartorpoq. Inuusuttut angerlarsimaffiup avataanut inissinneqarsimasut pillugit suliniuteqareermermi malinnaaffiginnittarneq ineriartortinniarlugu misiliutitut suliniuteqarnissamut kommunit qulit 2009-mi aningaasaliiffigineqarput. Suliniutini quliusuni suliniuteqareermermi malinnaanermik misilittagaalersut pillugit Socialministeriap 2010-mi maajimi SFI naatsorsuusioqqullugu qinnuigaa. Nalilersuinermi siunertaavoq, inuusuttut angerlarsimaffiup avataanut inissinneqarsimasut namminersortutut inersimasutut inuuneqalernissamut pitsaanerusumik ikaarsaarnissaanut, suliniuteqareermermi malinnaanerup qanoq pissutsillu suut aallaavigalugit qulakkeereqataasinnaanera pillugu ilisimasaqalernissaq. SFI-p apersuinerit pitsaasut katillugit 45-t ingerlappai, nalinginnaasumik nalunaaquttap aappaa avillugu sivissuseqartut, apersorneqarput inuusuttut suliniummut ilaasut, suliniutini qitiusutut suleqataasut, suliniutinik aqutsisut sullissisullu. Misiliutitut suliniutinit misilittakkat pingaarnertut takutippaat, suliniuteqareermermi malinnaanermik suliniuteqarnerup nukittorsarneqarnissaa pisariaqartinneqartoq. Inuusuttuni angerlarsimaffiup avataanut inissineqasimasuni ajornartorsiuteqarfiunerpaavoq, taakkulu amerlanerpaartaasa tapersersorneqanngitsumik inersimasutut inuuneqalernissamut naammaginartumik ikaarsaartarnerat takorlooruminaappoq.

Suliniutip taassumalu sunniutai pillugit pitsaasumik naliliinerup naqissuserpaa suliniuteqareermermi malinnaasarnerup nukittorsarneqarnissaata pisariaqartinneqarnera, tassa inuusuttunit sulisunillu apersorneqartunit tamanna erseqqissarneqarpoq. Sulisut tungaannit isigalugu, suliniuteqareermermi malinnaaneq pisuni pingasuni immikkut ittumik angusaqarfiusarpoq:

- Inuusuttut ilinniagaqarnermik aallartitsisut amerlanerusarput
- Inuusuttut aalaakkaanerusumik ineqarnikkut atugaqalertarput

- Inuusuttut inuttut attaveqaatitik annertusartarpaat ineriartortillugillu

Piffissaq ungasinnerusoq isigalugu suliniutip sunniutigisinnaasai pillugit angusat takutitsinngillat, misilittakkalli nunat tamat ilisimatusarnikkut angusaannut naleqqupput, ilisimatusarnikkut angusat takutippaat, inuttut ajattugaasinnaaneq suliniuteqareernermi malinnaanerup pitsaaliorsinnaagaa, kiisalu inuusuttut angerlarsimaffiup avataanut inissinneqarsimasut pitsaanerusumik siunissaqartilertarai.

Suliniuteqareernermi malinnaaneq pillugu inuusuttut naliliinerat siullertut atassuteqaataasinnaasunut tunngassuteqarpoq. Tassani inersimasunut ilinniagaqarsimasunut atassuteqarneq pineqarpoq – nalinginnaasumik inuttut attaveqaataasumut – taanna illuatungeriit akornanni tatigeqatigiinnermut pingaaruteqarpoq, ilaatigooriarlunilu inuusuttup sunik tamanik oqaloqatigisinnaasutut inersimasutut attaveqaatituarisarlugu. Aamma inuusuttunut allanut suliniummut peqataasunut attaveqartarneq pineqarpoq, tamanna 'allaanerusutut' pineqarani imaluunniit inuttut immikkoortinneqarani naligisat akornanniilluni toqqissisimanissamat pingaaruteqarpoq. Toqqissisimaneq inuusuttut angerlarsimaffiup avataanut inissinneqarsimasut kisorliortarnerannut illuatungiliuttoq.

Misiliutitut suliniutit amerlanersaanni 'poortugaq' assigiinngitsunik neqeroorutitik imalik neqeroorutigineqartarpoq, assersuutigalugu inuit ataasiakkaarlugit tapersersorteqarnissaat (nalinginnaasumik inuttut attaveqaataasumit) aamma inooqataanermit tunngassuteqartut (ataatsimoortumik sammisassaqtitsinerit, naapittarfiit il.il.). Ataqatigiissitsinissamat periarfissanik taakkuninnga misilittagaqarnerit pitsaalluinnarput, taakkulu tikkuussippat, suliniuteqareernermi malinnaanermik suliaqarnermi aaqqiissutissanik eqaatsunik ineriartortitsinissamik pisariaqartitsisoqartoq. Inuusuttut pisariaqartitaat assigiinngissuteqaqaat: namminiilernissamat nalinginnaasumik ikiorneqarnissamat aamma 'naggataasumik ingerlateqqinneqarnissamat suliniutitigut annertunerungaatsiartumik ikiorneqarnissamat. Aamma piffissaq ungasinnerusoq isigalugu inuit ataasiakkaat pisariaqartitaat annertuumik assigiinngissuteqarput: Suliniuteqareernermi malinnaaneq namminiilernissamat tapersersuineruvoq, taamaammallu inuusuttup ineriartorerani sukkulluunniit pisariaqartitaat assigiinngittarnerat pissusissamisoorpoq.

Eqaatsumik suliniuteqareernermi malinnaanermi pingaarutilik tassaavoq, siusissukkut inuusuttumut attaveqartarneq, tassa angerlarsimaffiup avataanut inissinneqarsimanerup naannginneranili periarfissat atuuttut pillugit inuusuttoq ilisimatinneqartussaavoq eqqarsarnissaminullu periarfissinneqarluni. Alla pingaarutilik tassaavoq, inuusuttunut suliniuteqareernermi malinnaaffigitinnissamat naaggaarsimasunut imaluunniit malinnaaffigitinnerminnik unitsitsiinnarsimasunut, ingerlatsiviulli tungaanit isigalugu suli tapersersorneqarnissamik pisariaqartitsisunut tunngatillugu orniguttarluni sulineq. Naggataatigut misiliutitut suliniutip tamarmiusup pingaaruteqartutut takutippaa, neqeroorutitut atorineqartut eqaatsumik aaqqissuunneqarsimanerat. Suleriaatsit atorineqartut pinngitsuuisinnaajunnaartitsisanngillat imaluunniit imminerminni namminiilersinnaatitsisanngillat. Suleriaatsilli atorineqartut qanoq qaqugukkullu atorineqarnerannut tunngatillugu eqaatsumik suliaqarneq aalajangiisuusarpoq. Inuusuttut namminneq pisariaqartitaat naapertorlugit eqaatsumik sulineq aamma sulianik aaqqiisinnaaneq qitiupput.

## **Marie Pedersen**

Piareersarfinnut tunngatillugu anguniagaavoq, 2020-mi innuttaasut sulisinnaasut pingasuugaangata ataaseq ilinniarsimasuussasoq. Ilinniartut sulinermillu misiliisut ilinniarnernanni Piareersarfiit sullissisarput.

Piareersarfik ilinniartoqarfivoq qinnuteqaatinik tiguisartooq qinnuteqaatinillu inuussutissarsiutinik ilinniartinnut ingerlatseqqittartooq. Piareersarfinni AEU-mik (Inuussutissarsiutinik ilinniagaqarnissamut ilinniarneq Akuerisaasoq) ilinniarnissaq neqeroorutigineqartarpoq. AEU kalaallisut, danskisut, tuluttut matematikkimilu eqaatsumik piginnaangorsaataasumillu ilinniartitsineruvoq. Innuttaasut Inuussutissarsiutinik ilinniartinnut isernissamut piumasagaataasunik naammassinnissimangitsut periarfissaqarput, AEU aqutugalugu pikkorissarnissamik.

AEU najukkami Piareersarfimmi neqeroorutigineqartarpoq, ilinniartullu ataasiakkaat tunngavigisaat ilinniakkatigullu pisariaqartitaat aallaavigalugit aqqissuunneqartarluni. Piareersarfimmut saaffiginninnermi, ilinniartitsisoq imaluunniit siunnersorti peqatigalugu, ilinniagassat sorliit pisariaqartinneqarnersut aamma modulimi sorlermi aallartittoqassanersoq paasiniarneqartarpoq.

AEU modulini 4-nut agguagaavoq, siulleq ukiup affaanik sivilissuseqartoq taaguuteqarpoq 1. aamma 2. modul, tullia aamma ukiup affaanik sivilissuseqartoq taaguuteqarpoq 3. aamma 4. modul. Moduli tamarmik misilitsinnermik naggaserneqartarput. AEU-mik misilitsissimanermik uppersaateqarluni Kalaallit Nunaanni inuussutissarsiutinik ilinniartoqarfinni ilinnialertoqarsinnaavoq.

Qinnuteqartartut amerlasuut innuttaasuupput inuussutissarsiuteqarnissamut ilinniagaqarnissamullu piareeqqasut, ilaat appasippallaartumik karakterillit imaluunniit meeqqat atuarfiannik naammassinnissimangitsut. Ilaat atuarfimmit anisitaasimapput, arlallillu ilungersunartumik alliarternermik pissuteqartumik meeqqat atuarfiinik allatulluunniit ilinniagaqarnissamik naammassinnissinnaasimangillat.

FA tassavoq meeqqat atuarfiani naggataarutaasumik soraarummeerneq, nangitsiviusumillu ilinniagaqarnissamut isissutaasinnaasoq.

Kalaallit Nunaanni Piareersarfiit tamarmik siunnersorteqarput, Piareersarfinni ilinniartunut, ilinniarnissamik qinnuteqartunut, sulinermik misiliisunut innuttaasunullu siunnersuisussat. Ass. ilinniartoq siunnersoraagamikku, suna ajunngitsumik ingerlanersoq sunalu pitsaangorsarneqassanersoq pillugu oqaloqatigiissutigisarpaat. Atuarfimmi ilinniartoq naammassippat, siunnersortip suliffissamut/sulinermik misiliiffissamut imaluunniit nangitsiviusumik ilinniartitaanernut aqutissiuutissavai. Ilinniagaqarnissaq suliffeqarnissarlu eqqarsaatigalugit, ilinniartunut ataasiakkaanut tunngatillugu siunnersortit iliuusissatut pilersaarusiussapput. Siunnersuinikkut sapersinneqannginnissaq anguniarneqassaaq eqqortumillu siunnersuisoqarlunilu tapersersuisoqassaaq.

Nuummi Piareersarfimmi ilitsersuisoqartarpoq, tassani atuartut inuttut atukkatigut oqimaatsorsioortut atuartullu ilikkariartorniarnermik ajornartorsiuteqartut, ilinniakkaminnik naammassinninnissaat periarfissaqartinniarlugu immikkut ittumik tapersersorneqarlutillu siunnersorneqartarput.

### **Andu S. Olsen: Abstract – Karl Andersenip saqqummiussaanut tunngatillugu**

Suliniuteqareermermi malinnaanissaq pillugu isumasioqatigiinnissap pilersaarusiorderneranut atatillugu, inuussuttut siusinnerusukkut inissinneqarfigisimasaminnit malinnaaffigineqarsimanermik namminneq misilittagallit ilaatinneqarnissaat pingaaruteqarsimavoq.

Kommunit marluk attaveqarfigivakka, taakkunungalu ajornaatsuinnaasimanngilaq inuusuttunik saqqummiussisinnaasunik nassaarnissaq. Taamaattumik Uummannami Meeqqat Angerlarsimaffiata forstaderia Ann Andreassen aperivara, ilisimagakku najugaqartutik pillugit suliniuteqareermermi malinnaasarmermik misilittagaqarlutut.

Karl Andersen toqqarneqarpoq. Inuusuttoq malugisariaqartoq, meeraanermini inuusuttuunerminilu atugarliortaraluarluni inuunermit unammillernartuinullu pitsaasumik kajumissuseqartoq.

Oqaatigineqarsinnaavoq, meeqqat angerlarsimaffianni imaluunniit angajoqqaarsiani najugaqarnerup pitsaaqutigigaa, meeqqap imaluunniit inuusuttup tapersorsorneqarnera aalajangersimasumillu atugassaqartinneqarnera, kiisalu inersimasunit paasinnissusilinnit isumassorneqarnera asannittumillu pissusilersorfigineqarnera. Meeqqap imaluunniit inuusuttup immikkut ittumik pisariaqartitaanik isumaginninneq.

Taakkununga eqqortumik ikiuisinnaaneq, isumassuisinnaaneq, asannissinnaaneq aamma tapersorsuisinnaaneq angujuminaatsuvoq. Tassami tamatigut ajornaatsuinnaaneq ajorpoq aamma tamarmik assigiinngitsuunerat pissutigalugu. Imminermini akissarsiassaavoq, takusinnaallugu inuusuttoq suliniuteqareermermi malinnaanermik misilittakkaminik atuisoq, piffissarlu ungasinnerusoq isigalugu imminut ikiorsinnaasoq. Tassa suliniuteqareermermi malinnaaneq isumalluutissanik atuinissamut atatillugu eqqarsaatigilluagaasoq piumassuseqarfiusorlu.

### **Marie Riishøjgaard**

Suliniuteqareermermi malinnaanissaq pillugu suliniut, Haderslev Kommunimi pilersaarusiorderneqartoq

”Siusinnerusukkut angerlarsimaffiup avataanut inissinneqarsimasut pillugit Suliniuteqareermermi malinnaasinnaatitaanermik misiliineq” pillugu SFI-p (Det Nationale Forskningscenter for Velfærd) misiliinerup qiteqqunnerani nalilersuiner aallaavigalugu, Haderslev Kommune Suliniuteqareermermi malinnaaneq pillugu ingerlatsinermermik oqaluttuarinnittussatut toqqarneqarpoq. Suliniut ukiut aappaat avingajallugu ingerlanneqarpoq, aamma Haderslev Kommunip ilaatigut SFI-p inassuteqaataasa ilaat aallaavigalugit Suliniuteqareermermi malinnaaneq ingerlappaa, soorlu inuusuttunut arlalinnik neqerooruteqarsinnaaneq (ass. Mødested), 17½-inik ukioqaliinnartulli atassuteqaatissaannik pilersitsinissaq, aamma ilaatitsisinnaaneq aamma inuit ataasiakkaat sullinneqarneranni eqaatsumik sullissisarnissaq.

Suliniuteqarnermut tunngaviuvoq, misissuinerit takutimmassuk, angerlarsimaffiup avataanut inissinneqarsimasut ukiumikkut peqatiminnut sanilliullutik kingusinnerusukkut inuunerminni makkuninnga atugaqarnerusartut:

Ilinniagaqannginneq/suliffeqarfeqarfinnut atassutikinneq, naleqquttumik inissamik nassaarniarmermik ajornartorsiuteqarneq, tunngaviusumik inuunermi piginnaasassanik amigaateqarneq, annikitsuaqqamik attaveqaateqarneq aamma inuttut ajornartorsiuteqarneq.

Sullinniakkat tamarmik Suliniuteqareernermi malinnaaffigineqarnissamik neqeroorfigineqassapput. Misissuineq Haderslev Kommunimi Meeqqanut Ilaqutariinnullu immikkoortotaqarfimmi siunnersortinit ingerlanneqassaaq. Misissuineq assigiissaartumik pisassaaq, ajornanngitsumik, sukkasuumik tikikkuminartumillu. Inuusuttup Suliniuteqareernermi malinnaaffigineqarnissamik toqqaanissaanut inuusuttumik naapitseqqaarneq pingaaruteqarnerpaavoq. Taamaattumik pingaaruteqarpoq, isumassarsiamik misissuinermi suleqataasup inuusuttumut 'tuniniaasinnaanera'. Aammattaaq siunnersorti peqatigalugu naatsorsuutigisanik naleqqussaasinnaaneq pingaaruteqarpoq.

Oqartussaasoqarfiit assigiinngitsut inuusuttumik sullissiniarneranni, Haderslevimi Suliniuteqareernermi malinnaanermi ingerlatitseqqinnissaaq ataqatigiissaartarparput. Taamaalilluta suleqatigisatsinnut tunngatillugu pingaarutilimmik suleqataasarpugut. Aamma inuusuttumut atassuteqartarneq akisussaaffittut tigusarparput, ilisimavarpullu inuusuttut ikiorneqarnissamik pisariaqartitsinerpaaffimminni tunuartersinnaasut.

Misilittakkatta takutippaat, 'inuup tamarmiusup ingerlalluarnissaa' aamma atassuteqartarneq pillugu pingaarnertut sammisaqaraagatta iluatsitsinerpaasartugut. Tamatuma kingorna pissusissamisoortumik suliffissat ilinniagaqarnerillu il.il. takkuttarput.

Eqqarsartaaserput malillugu sulinitsinni pingaarnertut tunngavigaarput, inuusuttumut piumasqaateqannginnissarput, inuusuttulli annertuumik isumalluarfigalugit takutsitsisarnissarput. Pitsaasumik akuersaarnartumillu attaveqartarnitsigut kissaatigaarput, inuusuttup nammineq inuunerminik akisussaaffeqalernissaa. Siunertaavoq, Suliniuteqareernermi malinnaaffigitinnerup naammassinerani, attaveqaatiminnit tapersersorneqarlutik nammineersinnaalernissaat. Tassa inuusuttup pisariaqartitsinera aallaavigalugu tapersersortarparput. Inuusuttoq suliassaanik arsaarlugu sulineq ajorpugut, inuusuttoq suliassaanik naammassinninnissaanut tapersersortarparput. Suliap ingerlanera malinnaaffigisarparput, ineriartornermi tassaniippoq – aamma piffissaq sivisoq atornerqaraluarpuunniit!